



ATASSUT
Steen Lyngø

UPA15/7-1
06.03.2015

2015-mut aningaasanut inatsisissatut siunnersuut
(Aningaasaqarnermut Aatsitassanullu Naalakkersuisoq)

Siullermeerneqarnera

Aningaasanut Inatsisissatut siunnersuut 2015-moortoq Naalakkersuisunit maanna saqqummiunneqarsimalereerpoq.

2015-mut aningaasanut inatsisissatut siunnersuutip ilusilersorneqarnerani malunnarpoq Naalakkersuisut nutaat atuutilersimasut aammalu qaammatini arlalaluinnarni Naalakkersuisutut atuussimasut. Taamaammatt Naalakkersuisut siuliisa aningaasanut inatsisissatut siunnersuutigisimasaannut sanilliullugu allannguutaasut annertugisassaangillat. Tamannalu immini ippiginiassallugu pissutissaqarsorinangilaq.

Atassut isumaqataavoq, Naalakkersuisut erseqqissarmassuk ukiuni makkunani atuuttuni aningaasaqarnikkut killiffippit unamminartumiittoq aammalu siunissami unammilligassat imaannaangitsuussasut taamaammallu iluarsaaqqiinnerit aaqqissuusseqqiinerillu Naalakkersuisut piaartumik sulissutigalugit aallartissallugit kissaatigigaat. Soorlu Naalakkersuisut namminneerlutik erseqqissaraat, innuttaasut pilersuisut ikililartussapput pilersugassallu amerliartorlutik, tamatumalu ilutigisaanik nunatta aningaasat isertittagai ukiuni aggersuni ikinnerulissasut matumani eqqoriarneqarluni.

Pissutsit taamaannerisa pisussaaffilerpaatigut, Inatsisartut aammalu Naalakkersuisut suleqatigiillutik aaqqissuusseqqinnernik arlalinnik tigussaasunik aallartitsisoqarnissaa ukioq manna aqutissiuutissagaat, taamaalilluni allannguutit ukiuni tulliuttumi aallartinneqarnissaat qulakkeerneqarsinnaaqqullugu.



ATASSUT INATSIARTUNI

Atassut iluarisimaarinnippoq, Naalakkersuisut kissaatigimmassuk nunatta aningaasaatai atorluarneqassasut at Naalakkersuisut, tamannalu pissasoq aningaasaliinikkut, tamatumalu malitsigisaanik sapinngisamik annerpaamik apaaqqissuusseqinnerit iluaqutigalugit inuiaqatigiinni aningaasaqarnerup patajaannerusunnortinniarneqarnissaa sulissutigineqassasoq. Taamatuttaaq maluginiarnarpoq Naalakkersuisut ammaffigigaat aningaasaliiffigineqartussat ilaasa avataaniit aningaasaliinikkut pissasoq. Siusinnerusukkummi iluatsilluartumik aningaasaliisarnermi suleqatigeeriaaseq OPP, tassa pisortat namminersortullu suleqatigiinnerisigut avataaniit aningaasaliisoqarneratigut suliaqartsitsisarnerit ingerlanneqartarsimapput. Eqqaaginnartigu Utoqqarmiut Kangerluarsunnguani erngup nukinga atorlugu nukissiorfiliortoqarsimanera.

Taamatuttaaq Atassut iluarisimaarinnippoq nunatta takornariaqarfittut inerisarneqarnissaanik Naalakkersuisut sulissutiginninniarmata. Suliassaqqarfik taanna Atassutip isumaa malillugu sukkanerpaamik ineriartortinneqarsinnaalluarpoq. Atassut isumaqqarpoq suliassaqqarfik tamanna tassaasoq, aningaasaliinikkut pilertortumik isumannaatsumillu piaartumik inuiaqatigiit aningaasarsiornerikkut iluaqutissarsiffigisinnaasaat mener. Tamannali iluatsilluassappat piunasaqaataavoq, aningaasaliisoqartinnagu suliassaqqarfiup aqqissorluakkamik ataqqatigiissaarluakkamillu pilersaarusiortfigineqarnissaa.

Atassut aamma isumaqqarpoq, piffissap ingerlanerani aatsitassarsiornerikkut inerisaaniarnerup nalilersorneqartuarnissaa pingaaruteqartoq. Ilisimaneqqarpoq aatsitassarsiornermik ingerlataqarneq ukiuni arlalissuannortuni atuuttuni nunarsuaq tamakkerlugu aningaasarsiornerikkut ajornartoormik eqqugaangaatsiarsimammat aammalu aatsitassat suliareqqinneqanngitsut nalingi appariartorsimasut, tamatuma malitsigisaanik aningaasaliiumasut tunuarsimaanerulersimapput mianersornerulerlutillu. Taamaammat Atassummit isumaqqarpugut pingaaruteqartuusoq piunasaqaatigisartakkavut – avatangiisit annerpaamik illersorneqarnissaannik innarliinngikkaluarluta – piviusorsiornermik aammalu nunanut allanut unammillerluarsinnaasumik inissisimatinnissaat pingaaruteqartut. Unammillersinnaassuseqarluaruttami aningaasaliiumasut suliffissanillu pilersitsisinnaasut nunatsinnut aningaasaleerusussuseqarnerat annertusarsinnaavarput. Pingaaruteqartorujussuuvormi nunatsinni suliffissanik amerlanerusunik aammalu aningaasanik isertitassanik amerlanerusunik pilersitsinissarput.



Taamatutaaq aamma pingaaruteqarluinnarpoq nunatsinni inuussutissarsiutit annersaata naleqqussarneqartuarnissaa, tassalu aalisarnerup, ineriartortinneqartuarneqarneratigut aamma qulakkeersimaniarsinnaavarput pisuussutitta uumassusillit annerpaamik iluanaarutiginiarsinnaavagut. Aalisarnermik inuussutissarsiuteqarneq pitsaasunik atugassaqtitsilluni inerisarneqassaaq. Taamaattorli aamma pingaaruteqarluinnarpoq aalisarnerup iluani atugassarititaasunik pitsaasumik sinaakkusersuinissarput, tamatumami malitsigissammagu nunatsinni suliffissanik amerlanerusunik pilersitserusussuseqalernerq avammullu tunisassiat niuerutigineqannginnerini naleqarnerulersitserusussuseqalernerq. Suliffissanik amerlanerusunik pilersitserusussuseqalissagutta sakkussarisinnaavarput assigiinngisitaartumik akitsuusersueriaaseqarneq siuarsarlugu, assigiissumillu akitsuusersueriaaseqartitsineq annikinnerulersillugu, assigiissumimmi akitsuusersuineq suliffissanik pilersitserusussuseqarnermut killeqartitsisarpoq.

Atassummut pingaaruteqarpoq, inuussutissarsiutit suulluunniit, pisuussutinik uumassusilinnik uumaatsunillu aallaaveqartumik ingerlanneqartut suliffissanik nunatsinni annerpaamik pilersitseqataanissaat, tassa pisuussutit pineqartut nunatsinnit anninneqannginnerini illersorneqarsinnaasumik sinaakkusiinikkut nunanut allanut sanilliulluta unammillersinnaassuseqarnissarput qulakkeerniartariaqaratsigu.

Atassut assut iluarinnippoq nuannaarlunilu, aningaasanut inatsisissatut siunnersuummi ilanngunneqarsimammat Pinngortitaleriffimmut aningaasaliissutit amerlineqarnissaat. Aningaasaliinerunerup qulakkiissavaa, Pinngortitaleriffiup misissuisarnerminut aammalu imaani pisuussutit annertussusaannik naatsorsuisarnerminut sinaakkutassarissaartinneqarnerulissaaq. Misissuinerit amerlassutsinillu nalunaarsuinerit annerulersinneqarpata pisassiissutigineqartartut aamma amerlanerulersinnaanerannik, tamannalu pisinnaassaaq piujuaannartitsinermik aallaaveqarneq tunngavigalugu. Atassut qineqqusaarnermi piumasaqaateqarpoq Pinngortitaleriffimmut aningaasaliinerusoqassasoq, tamatumami pisassiissutigineqartartut annerulersinneqarnissaat qulakkeersinnaammagu. Aningaasaliinerusoqartussanngorpoq, taamaattorli Atassutip isumaa naapertorlugu mianersorpallaalaartoqarpoq, taamaammat aningaasanut inatsisissani tullinnguuttuni anguniakkamut naleqqunnerusumik aningaasaliissutit amerlineqarneri suli qaffasinnerusinnaapput.



ATASSUT INATSIARTUNI

Naggataatigut immikkut aamma taarusuppara maluginiaratsigu Naalakkersuisut massakut atuuttut, Naalakkersuisut siuliani atuuttut suliniutaat ingerlateqqissimammassuk, tassalu sanaartornerup nuna tamakkerlugu aammalu pisariaqartitsineq naapertorlugu tulleriaarinerup ingerlanneqarnissaanik anguniagaqarneq ingerlatiinnarmassuk.

Taamatut oqaaseqaateqarluta Inatsisartut Naalakkersuisullu akornatsinni anguniagaqarfiulluartumik isumaqatigiinniarnissarput qilanaaralugu oqaatigissavarput. Aammalu siunnersuutip matuma aappassaaneerneqannginnerani Inatsisartut Aningaasaqarnermut Akileraartarnermullu Ataatsimiititaliaanut suliassanngortinneqassasoq ilanngullugu inassutigissavarput.